



Kumpulan Wang COVID-19 ditutup

Oleh Latifah Arifin - November 30, 2023 @ 6:54pm
latifah@bh.com.my

KUALA LUMPUR: Dewan Rakyat hari ini meluluskan penutupan Kumpulan Wang COVID-19 mengikut Akta Tatacara Kewangan 1957 (Akta 61).

Ia dipersetujui melalui undian suara dan diluluskan oleh Yang Dipertua Dewan Rakyat, Tan Sri Johari Abdul.

Terdahulu, Timbalan Menteri Kewangan I, Datuk Seri Ahmad Maslan, membentangkan cadangan terbabit.

Ahmad memaklumkan, sejumlah RM110 bilion dana keseluruhan diperuntukkan menerusi Kumpulan Wang COVID-19.

"Saya akan berikan senarai laporan terperinci jumlah yang digunakan bagi Kumpulan Wang COVID-19, termasuk Bantuan Prihatin Nasional sebanyak RM39.9 bilion, projek berskala kecil mewakili RM6 bilion, program kemahiran peningkatan kemahiran sebanyak RM1.2 bilion, pembiayaan PKS PENJAN RM180 juta, perbelanjaan COVID-19 (RM5.32 bilion) dan diskaun bil elektrik (RM6.543 bilion)," katanya di Dewan Rakyat, hari ini.

Beliau menjawab celahan Wong Kah Woh (PH-Taiping) yang ingin mengetahui perincian wang yang dibelanjakan menerusi Kumpulan Wang COVID-19.

Ahmad berkata, tindakan sewakarnya akan diambil sekiranya didapati berlaku salah guna dana berkenaan.

"Kita tahu Laporan Ketua Audit Negara 2022 sudah dikeluarkan dan mungkin ada sentuh perkara berkaitan (salah guna). Kita akan bangkitkan perkara ini dan bahas pada sesi sidang akan datang, berkemungkinan Februari depan," katanya.